



# basic education

Department:  
Basic Education  
**REPUBLIC OF SOUTH AFRICA**

## **SENIOR CERTIFICATE EXAMINATIONS/ NATIONAL SENIOR CERTIFICATE EXAMINATIONS**

**SISWATI LULWIMI LWASEKHAYA (HL)**

**LIPHEPHA LEKUCALA (P1)**

**2019**

**EMAMAKI: 70**

**SIKHATSI: Ema-awa 2**

**Leliphepha linemakhasi la-12.**

**TICONDZISO KULABAHOLWAKO**

1. Leliphepha lehlukaniswe TIGABA LETINTSATFU:
 

SIGABA A:	Sivisiso	(30)
SIGABA B:	Sifinyeto	(10)
SIGABA C:	Takhi netimiso tekusetjentiswa kwelulwimi	(30)
2. Phendvula YONKHE imibuto ngeSiswati.
3. Cala LESO NALESO SIGABA ehasini LELISHA.
4. Dvweba umugca emva kwaleso naleso sigaba.
5. Tinombolo tetimphendvulo atihambisane naleto letisephepheni lemibuto njengobe tinjalo.
6. Shiya umugca emkhatsini wetimphendvulo takho.
7. Caphelisia sipelingi/lupelomagama nendlela lewakha ngayo imisho.
8. Siphakamiso sekulawulwa kwesikhatsi:
 

SIGABA A:	Lokungenani emaminithi la-50
SIGABA B:	Lokungenani emaminithi la-30
SIGABA C:	Lokungenani emaminithi la-40
9. Bhala ngebunono nangesandla lesifundzekako.

**SIGABA A: SIVISISO****UMBUTO 1**

1.1 Fundza letheksthi bese uphendvula imibuto lelandzelako.

**ITHEKSTHI A****BUGEENGU EMMANGWENI**

- 1 'YeSiphelele, kantsi wente njani lamuhla? Yini letiga lofike nato? Utsi unayo yona indibilishi lomuntfu lonjena? Ngiyakubona sewuyadlala. Lapha sisebenta imali,' kusho LaMasina akhulumu nendvodzakati yakhe lesandza kufika ihamba nalelinye lijaha. Bakhulumu basekamelweni laLaMasina. 5
- 2 Lenyatane lafike nayo lamuhla ayifani naleti lahlala efika nato. Timphahla letigcokile atikhombisi kutsi idla kahle. Libhuluko likhulu kunayo, lihembe sengatsi ilibolekile, liyibamba ngci emikhonweni. Simanga kutsi imoti lehamba ngayo yinsha futsi iyabita. 10
- 3 'Kahle kumemeta yemake, utakuva lomuntfu. Asubindze ngikuchazele. Lenyatane siyletselwe lidloti. Kulamalanga sitawube sidla lizambane lapondo. Sitayisenga kancane ize itsi, tjwi, tjwi, sengivutsiwe.' Imali itsi babe kuyo. Awuyati imoti lehamba ngayo.  
'Loludlwaphu lolunje, utsi luyitsatsaphi imali nemoti?'  
'Lomuntfu ungusomabhizinisi Eswatini. Unelipulazi, titolo neligalaji 15 lelitsengisa timoti. Ute lapha kutewuhlabu likhefu. Uvelelwe lishwa lekubanjwa inkunzi. Utsi abefuna kungena ebhange akhiphe imali kantsi tincwadzi tasebhange tisesikhwameni lesingemuva emotini. Utse navula, wabona tandla setiyaluka embikwakhe kantsi sengibo bafana. Munye wacondza esikhwameni setimphahla, nangu nalomunye asatsatsa 20 sikhwama lesinetincwadzi tasebhange naletinye timphahla. Nguye Iowa asagijimisa labafana kantsi utatitsela elugibeni Iwabo. Wabanjwa wakhonjwa ngesibhamu wakhunyuliswa labekugcokile. Loku lakugcokile, utsi uhawukelwe ngulomunye umuntfu lonesitolo. Ngikhulumu nje, usashayele ekhaya kutsi bamtfumelele letinye tincwadzi langatfola kuto 25 imali.'
- 4 'Manje wena umtfole kanjani?'  
'Ngitsite ngitimele weta kimi, wabuta kutsi kute yini indzawo yekulala lebita kancane lengiyatiko. Ngibese ngiyambuta-ke nangibona lemoti lahamba ngayo wase ungitjela yonkhe indzaba. Washo nekutsi akafuni kuhlala etindzaweni letisembili akulesimo lakuso ngobe kutamehlisela sitfunti. Ufuna kulindza kute bamletsale timfanelo takhe atewukwati nekutsenga timphahla letincono. Nami ngivele ngangacitsi sikhatsi ngalisebentisa lelitfuba lekutsi ngimuphe indzawo yekufihla inhloko.'  
'Cha sengiyakuva-ke, nembalu uhlakaniphile sibili. Asisale sibuyela 30 endlini yekuphumula, ingaze iwasole ummbila imphangela.'

- 5 Nabefika endlini yekuphumula, LaMasina wasibingeleta lesivakashi wasililela nangaloko lokusivelele. 'Kute make lesingabuye sikusho, nabo yindlela labatiphilisa ngayo. Tintfo letincane leti. Mine ngingumuntfu lotimele kahle ngasetimalini ngikhuluma nje kusasa siyatseleka lesinye setisebenti naletinye tincwadzi tasebhange.' Tihlatsi tavakashela tindlebe kuLaMasina neva lomuntfu atincoma. Wavele watitjela kutsi usetamdlela ematsambo engcondvo. 40
- 6 Bakhuluma nje bahleli babukele mabonakudze. Siphelele usendlini yekupheka ulungisela kuphakela. Kusenjalo kwashaya sikhatsi setindzaba, washiya labekwenta watewutilalela. Phela bekungumkhuba walapha ekhaya kutsi tindzaba atiphoswa. Titse natiphela kwavela lumphawu lwemaphoyisa. 'Nasi simemetelo lesibalulekile. Kubaleke tiboshwa letintsatfu ejele lelikhulu lasePitoli. Letiboshwa tibambe liphoysa lebeligadzile, talephula intsamoa, talemuka nelivolovolo. Tisuke lapho tacondza epulazini lelisedvute, **tavimbetela umninipulazi, tamdubula, tashaya tacitsa nelivolovolo kanye nemoti yeluhlobo Iwe-BMW, lebovu lenetinombolo letitsi, SDF 500HL.**' 50
- 7 Kusenjalo kwavela sitfombe semuntfu. Hawu, nobe sekutsiwa tintfo tiyefana, lomuntfu losesitfombeni ngulona labahleli naye. Siphelele watsi ubuka unina wamkhandza ahlahle emehlo akhamise nemlomo agcolotole mabonakudze. Watsi ubuka sivakashi wasikhandza singati nekutsi kushephi. Uyachubeka njalo mabonakudze. 'Lesinye setigebengu ilesisafunwa, besiboshelwe emacala ekubulala, kudlwengula nekugcekeza. Ningazami kusibamba, siyingoti. Losibonako uyacelwa kutsi ashayele sayitjeni Mlambo kulenombolo letawuvvela emva kwalesimemetelo.' 60
- 8 'Yehheni yenebaktsi! Kantsi ...' Watsi angakacedzi nekukhuluma LaMasina, Magangane wasukuma wahwashula livolovolo ekawosini, wevakala asatsi, 'Shhh! Shaya sengatsi uyabindza yemfatindzini. Nangabe nisafuna kudla emabele, bindzani shengatsi nifile. Anikate ningibone niyeva? Ningabe nisanyakata,' washo acondza elucingweni alunyomula elubondzeni. Tinyembeti besetigeletisa kwemfula, sifuba sesimanti nte. Siphelele wavele wabona indlu seyishaya situngeletane, wawela eceleni kwesihlalo labehleli kuso. 70
- 9 Magangane watsi nacedza kunyomula lucingo wava mabonakudze. Wasondzela kuSiphelele wamkhahlela watsi akuyiwe emakamelweni ekulala. LaMasina akatange afune kutjelwa, wavele watisukumela wangena kulakte likamelo, wengca Siphelele naye labecondze kulakte. Utse angakacabangi Siphelele, lomuntfu wabe amkhahlameta, amtjela kutsi akangene ekamelweni lenina ngobe batawulala bobatsafu. Lomuntfu wabahlokota kamatima ngelivolovolo abakhomba embhedzeni. Bavele bagibela bangakakhumuli. Balala babuka elubondzeni sebesaba ngisho nekugucuka babuke sivakashi sabo. 80 Magangane wahlala weyama sivalo. 75

- 10 Bacinisile labatsi butfongo busilima ngobe nakuboSiphelele befika. Nabo abati kutsi befika nini ngendlela lebebefuke ngayo. Batsi nabaphaphama, bakhandza litje lome inhlama.

[Lihalatelo: Likhasi 62–66]

- 1.1.1 Bhala inkhulomo lekuletheksthi lechaza kutsi lesento saSiphelele besisento lasetayele. (1)
- 1.1.2 Nguliphi lisu lelasetjentiswa nguMagangane kulahlisa umkhondvo wakhe emva kwekutsi abonakele kumabonakudze? (1)
- 1.1.3 Nika BUNYE bufakazi bekutsi boLaMasina bebaphila esikhatsini lapho besekusetjentiswa khona ithekhnoloji. (1)
- 1.1.4 Mabonakudze udlala yiphi indzima ekwehliseni lizinga lebugebengu eNingizimu Afrika? Shano KUNYE. (1)
- 1.1.5 Khetsa imphendvulo kuleti letilandzelako. Nguyiphi inombolo ummango longayisebentisa kushayela emaphoyisa nawuhlaselwe tigebengu?
- A 11110  
 B 01111  
 C 11011  
 D 10111 (1)
- 1.1.6 Bhala inkhulomo lekuletheksthi lengenhla lechaza kutsi, bakhandza kungenamuntfu. (1)
- 1.1.7 Kusuke kwente njani nangabe umuntfu abitwa ngenyamatane njengobe kuvela kuletheksthi? (2)
- 1.1.8 Ngabe kubangelwa yini kutsi lizinga lekweca emajele lenyuke kangaka? Nika KUBILI. (2)
- 1.1.9 Ucabanga kutsi yini leyenyusa lizinga lebugebengu emimangweni? Bhala emaphuzu LAMABILI. (2)
- 1.1.10 Ucabanga kutsi yini lebangela boLaMasina baphile lemphilo lebayiphilako? Bhala KUBILI. (2)
- 1.1.11 Ngekubona kwakho bekuyini inhoso yaMagangane yekukhetsa kuyewulala etindzaweni letishiphile abe anayo imali? Bhala KUBILI. (2)
- 1.1.12 Ngemaphuzu LAMABILI, phawula ngekutsi letimpahla letigcokwe nguMagangane tibuyaphi. (2)
- 1.1.13 Lenkhulomo yaLaMasina lets, 'Utsi unayo yona indibilishi lomuntfu ionje?' itivula ngayiphi indlela tingcondvo tetetsamelilwati emva kwekufundza letheksthi lengenhla? (2)

1.2 Fundza lesibonwa bese uphendvula imibuto lelandzelako.

### **ITHEKSTHI B**



[Itsetfwe: <http://www.kingfeatures.com>]

- 1.2.1 Yakusiphi sifundza lemoti lememe livili emhlane? (1)
- 1.2.2 Yini umsebenti wetimoti letifana nalemoti lememe livili emhlane? (1)
- 1.2.3 Ucabanga kutsi timeleni letimoti embikwalelenelivili emhlane?  
Bhala KUBILI. (2)
- 1.2.4 Nangabe wena bewuyindvuna yeLitiko Letekuphepha neKuvikela,  
yini lebewungayenta kuvikela loku lokwentekako kulesibonwa?  
Nika KUBILI. (2)
- 1.2.5 Ngabe lesimemetelo lesibhalwe ngalokucindzetzew endzimeni  
yesitfupha etheksthini A, sinabo yini budlelwano naloko lokwenteka  
etheksthini B? Sekela imphendvulo yakho ngemaphuzu LAMABILI. (4)

**SAMBA SESIGABA A:** **30**

**SIGABA B: SIFINYETO****UMBUTO 2**

Fundza letheksthi bese uyayifinyeta ngewakho emagama langabi ngetulu kwala-80. Sifinyeto sakho asibe ngendlela yetindzima (emapharagrafu), sivete **tinkinga letisikhombisa letibangwa tinhlelo tekuchumana ebantfwaneni.**

**CAPHELA**

1. Akukadzingeki kutsi ubhale sihloko.
2. Khombisa linani lemagenta lowasebentisile ekugcineni kwesifinyeto sakho.

**ITHEKSTHI C****TINHLELO TEKUCHUMANA**

Ngekwelucwaningo lolwengcile bantfwana labasebentisa tinhlelo tekuchumana ngalokwecile emakhaya bagcina sebahlangabetana netinkinga letinyenti etimphilweni tabo.

Nanobe letinhlelo tekuchumana tibonakala tiyindlela yekuphila kuletikhatsi talomuhla, lunyenti lwati loluhlonyulwako kuto kodvwa mnyenti nemonakalo letiwufakako elusheni losevele ubonakala nasebantfwaneni besikolo. Muva nje inhlango lemele tenhlalakahle ebantfwaneni itsi, kusetjentiswa kwetinhlelo tekuchumana ebantfwaneni besikolo kubanga lomkhulu umonakalo ekuchakateni kwelikusasa labo. Lenhlangano itsi bantfwana besikolo seahlala balele etindlini tekufundzela ngobe bacitsa sikhatsi lesinyenti babukelana netinhlelo tekuchumana busuku bonkhe. Ayisakhulunywa-ke yekwenta umsebebenti wesikolo labanikwe wona kutsi bawente emakhaya, awusentiwa sanhlobo.

Akugcini lapho, neludlame loluvela kuto letinhlelo tekuchumana, lwenta bantfwana bangasakwati kutiphatsa ngendlela lefanele etikolweni nasemakhaya. Linani lebantfwana lelingemaphesenti langemashumi lamatsatfu lokukhulunywe nabo, bavumile kutsi basebentisa sikhatsi sabo lesinyenti etinhlelwani tekuchumna nasebaphumile esikolweni.

Make Gamedze, lokhatsalela imphilo yebantfwana esifundzeni saseMpumalanga utsi, kumele umtali ngamunye afundzise bantfwabakhe tindlela letiphephile tekusebentisa tinhlelo tekuchumana nekutsi anakisise kutsi bentani kuto. Bantfwana abatjelwe kutsi bangacoci nebantu labangabati ngobe loko kungabenta kutsi bashushunjiswe. Lenye indzaba labuye wakhutsata ngayo kutsi umtali afundzise bantfwabakhe ngekungabi botsatsekile ngobe nabakwenta loko kungacina sekubafaka etindzabeni tekutsandzana nebantu labangabati lokungabalahlekisela likusasa lelichakatile. Utsi kumele kutsi bantfwana bavunyelwe kusebentisa tinhlelo tekuchumana ngobe nabangavunyelwa, batatisebentisa ngasese futsi batisebentise kabi. Ukugcizelele kutsi kumele bantfwana balandzelelwe batali babuke kutsi batisebentisa njani letinhlelo kute kungonakali tintfo letinyenti njengobe kugcina sekwenteka, utfole bantfwana sebangenela tidzakamiva ngekutama kulingisa labo labababona kuletinhlelo tekuchumana.

Emnyakeni lowengcile Ndvunankhulu weLitiko Letemfundvo Lesisekelo eNingizimu Afrika, ukhale ngekusalela emuva kwebantswana esikolweni nganca yekutsi bahlala babukelene nemidlalo leluchungechunge kubomabonakudze nebatali babo.

Ngekwembiko latsi banawo njengeLitiko Letemfundvo, linani lebantfu lelingemaphesenti langemashumi lasiphohlongo nesihlanu, lakuleli alifundzi nganca yenkoinga yekubukana namabonakudze, labadla sikhatsi sabo. Bekafakazela siphakamiso lesentiwa nguMnumzane lophetse Litiko Letemfundvo eMpumalanga sekutsi, bantswana besikolo abangavunyelwa kutsi babukele lemidlalo letfolakala etinhlelweni tetekuchumana.

[Itsetfwe: Mpumalanga News, 2017]

**SAMBA SESIGABA B:** 10

**SIGABA C: TAKHI NETIMISO TEKUSETJENTISWA KWELULWIMI****UMBUTO 3: SIKHANGISI**

Fundza lesikhangisi bese uphendvula imibuto lelandzelako.

**ITHEKSTHI D**

# **EMABHODO AKAPHEKASIDLE**

## **PHEKA WONGE! WONGISISE!!!**



1. Lamabhodo asebenta busuku nemini kantsi nemphilo iligugu kuwo.
2. Titfolele emabhodo akaPhekaside lapheka kudla lokuvutisa ematse.
3. Akagugi futsi akephuki, nobe aganklateka phasi, avele akubuke nje.
4. Akadzingi sihwayo kuwageza, kutsela emanti, hlobiyani wona.
5. Tinkhobe letiphekwe ngawo, tivutfwa locu, **nalesingenamatinyo sitidle tehle esiphundvu**. Kutsela emanti labilako nje, kudla kwakho sekuvutsiwe.
6. Titfolele akho lafana nalawa, wonge, wongisise.
7. Abhadalwa netinyanga leti-36, **ngaphandle kwentalo**.

[Itselfwe: [www.dreamtime.com](http://www.dreamtime.com)]

- |     |  |     |
|-----|--|-----|
| 3.1 | Phindza ubhale lomusho lokunombolo 5, esikhundleni seligama lelidvwetjelwe usebentise lenhlonipho. | (1) |
| 3.2 | Bhala umusho lonabomahambisana kuletheksthi lengenhla.   | (1) |
| 3.3 | Bhala KUNYE lokungenta kutsi tetsamelilwati letisebentako tiwatsenge lamabhodo.                    | (1) |

3.4 Khetsa imphendvulo leshaya khona kuletilandzelako. Sinongo sini senkhulumo lesisemagameni labhalwe acindzetelwa kunombolo 5?

- A Secamagama
- B Siphukuto
- C Simeleli
- D Selutfo

(1)

3.5 Yini inhloso yalokhangisako yekutsi abhale sicubulo kulesikhangisi lesingenhla?

(1)

3.6 Lomusho lokunombolo 4, utihhunga ngayiphi indlela tetsamelilwati? Bhala KUNYE.

(1)

3.7 Uchazani lokhangisako ngalencenye yemusho lebhalwe yacindzetelwa kunombolo 7?

(2)


3.8 Lutsini luvo lwakho ngenkhulumo lekunombolo 3?

(2)

[10]

**UMBUTO 4: IKHATHUNI**

Fundza lekhathuni bese uphendvula imibuto lelandzelako.

**ITHESKTHI E**

- 4.1 Phindza ubhale lomusho losenkhulumeni yalolophetse liphepha bese ubhala ligama lelingumcondvofana esikhundleni salelo lelicindzettelwe. (1)
  - 4.2 Shano kutsi umusho wekucala wendvodza lephetse liphepha, ucuketse yiphi indlela yesento. (1)
  - 4.3 Akha libitombici ngalamagama ladv wetjelwe kulomusho lolandzelako:  
Bantfu labephula umtsetfo kulekhathuni baboshwa ngemaphoyisa. (1)
  - 4.4 Cedzelela lomusho lonemacashati kulekhathuni ngekufaka ligama lelisha lelibunjwe eSiswatini, lelisho tigebengu. (1)
  - 4.5 Khetsa kutsi ngusiphi leselulo seseto/imphambosi kuleti letilandzelako. Enkhulumeni yalona lohleli phasi, kuneselulo sesento/imphambosi.
    - A Selulo sekwentana
    - B Selulo sekwentiwa
    - C Selulo sekwentisa
    - D Selulo sekwentela
(1)
  - 4.6 Lona locabangako, lobambelele etafuleni, abesho kutsini ngekusebentisa inkhulomonkholelo lebhalwe yacindzettelwa? Nika KUNYE (1)
  - 4.7 Akha umusho ngeligama, '**dida**', inshokutsi yalo yehluke kulena lesenkhulumeni yalowo lohleli phasi. (2)
  - 4.8 Faka inselele kulomusho wesibili enkhulumeni yalona lophetse liphepha kulekhathuni lengenhla? (2)
- [10]**

**UMBUTO 5**

Fundza letheksthi lenemaphutsa elulwimi bese uphendvula imibuto lelandzelako.

**ITHEKSTHI F**

'Nine bekunene, **kushwaphana lulwimi njengendvodza leyefukile** ngaloku lengikubonako. Loku lokwentiwe ngulendvodzana yami Simo, kuvule likhasi lelisha, lelimhlophe **bha** kimi. Sekusile nakimi engcondvweni. Sengiyalibona lelo phupho lowalisho ndvodzana. Nawe Majaha, ngiyetsemba utsalutsatsa lolunyawo Iwemnakenu. Nangabe utawuhamba ngalolunyawo IwaSimosami, uyawuba yindvodza kusasa.' 5

**Wavala emehlo ngeliduku.** Wagcina alisusile, wakhala njengemntfwana lomncane ...  
Base bayelekelelana naLaGwebu. Naye wasusa sematsambo sililo.

Cindzi asacondzise kuMajaha, watsi, 'Majaha, Simo ukwentele nawu **umcimbi** kukukhombisa lingekhatsi lenhlitiyo yakhe. Nawe ngicela umvulele yakho inhlitiyo. Buya nawe ute lapha eceleni kwami.' Asukume Majaha aye embili kuyise. Cindzi 10 **abambe Simo ngesekudla**, Majaha ambambe ngesancele.

Kwabonakala Majaha asakhala, wesuka wayotiphosa kuSimo, wamgona, bakhala bobabili. Kwagcina kusuke dzadzewabo wababamba **ngobe afuna babindze**. Kwahlatjelwa yinye yekuvala. Umfundisi wasukuma wenta umthandazo wekuvala. Kwase kuyadliwa. 15

[*Emaphupho Emadvwala, likhasi 118–119*]

- 5.1 Phindza ubhale lomusho losekucaleni, endzimeni yesitsatfu, bese ufaka sijobelelo sesikhuliso egameni lelicindzetelwe. (1)
  - 5.2 Cedzela lomusho lodvwetjelwe endzimeni yesibili kuletheksthi lengenhla ngesandziso sesimo. (1)
  - 5.3 Hlobi luni lwenkhulumo lolu lolucindzetelwe emshweni wekucala, endzimeni yekucala kuletheksthi lengenhla? (1)
  - 5.4 Phindza ubhale lomusho locindzetelwe endzimeni yesitsatfu, ugucule sento sivete umcondvo wekwentana. (1)
  - 5.5 Bhala lenkhulumongco ledvwetjelwe endzimeni yekucala, ibe yinkhulumombiko. Cala lomusho ngekutsi: Cindzi utsi, ... (1)
  - 5.6 Cala lomusho locindzetelwe endzimeni yesibili nga, 'Cha ...' (1)
  - 5.7 Phindza ubhale lomusho ube namentiwansombo.  
Umfundisi wasukuma wenta umthandazo wekuvala. (2)
  - 5.8 Tsatsa sentakutsi lesibhalwe sacindzetelwa endzimeni yekucala, usisebentise emshweni losesikhatsini lesitako. (2)
- [10]

**SAMBA SESIGABA C:** 30  
**SAMBA SAKO KONKHE:** 70